

## Cars parochians,

cars affons, giuvenils, seniors e tuts che han cun ina u l'otra contribuziun dau a miu anniversari da 70 onns ina tempra digna e festiva.

Jeu vi engraziar a tuts da cor per ils segns da renconuschientscha e d'engrazieivladad e generusadad. En bunamein 15 onns sundel jeu stada purtada da Vossa beinvuglientscha e da Vies sustegn. Cun plascher hai jeu fatg il survetsch ellas pleivs. Vus haveis adina accumpignau mei cun confidanza ed acceptanza. Aschia hai jeu dau vinavon quei che jeu hai retschiert da DIU e da VUS.

Ussa ei il temps cheu da prender cumiau da dus zun carezai loghens, da cars concarstgauns, dil lungatg mumma, d'ina part tiara paterna. Jeu fetschel in pass en ina nova fasa dalla veta cun gronda satisfacziun ed en nunemblideivla memoria ad in benediu e grazius temps. Bugen dundel alla communitad mias forzas per in auter pensum. Jeu carezel la communitad la quala ha purtau mei 50 onns e vegn era a haver quitaun da mei en malsogna e vegliadetgna. Igl ei in bien sentiment da star en survetsch da Diu cun consoras ch'aprezieschan e portan in'a l'otra en buns e grevs dis.

In special engraziament vi jeu exprimer a **Sora Zeno** che ha fatg siu survetsch durant **7 onns en casa Pervenda** ed ordeifer cun engaschi e slonsch. Era ella banduna nus cun in sentiment d'engrazieivladad per bialas e legras uras oravontut cun la gruppa da gimnastica. Las dunnas aunc fitas e moviblas han dau bia elan e gudiu sora Zeno cun sias ideas e las activitads.

A sora Zeno giavischein nus tuts ina ruasseivla sera sontga. Cun ses **79 onns** ha ella meritau in bi liug e bia renconuschientscha vinavon en claustra ad Ingenbohl. El feagl parochial dil matg vegnin nus aunc a leger vinavon e seregurdar da siu operar en nossas pleivs.

**Buns giavischs per ina graziusa fiasta da Pastgas**



## Informaziuns per omisduas pleivs.

Dumengia, ils **17 da matg** havein nus da votar pertuccont uras da religiun ed etica en nossas scolas. En connex cun la votaziun havein nus gia saviu leger differentas gadas ella pressa.

### **Nus lein exprimer a vus nies meini en caussa.**

Sco plevon eis ei per mei adina fetg impressiunont cura che jeu damondel ils geniturs ella celebrazion dil Batten: «**Essas vus prompts d'educar vies affon ella veta dalla cardientscha catolica e d'accumpignar el sin quella via ?**» «**GIE**», rispundan ils geniturs ed ein cunscients da lur responsablidad.

Sil fundament dalla veta religiosa en famiglia retscheiva igl affon era sustegn ed agid ellas uras da ducrina en nossa confessiun. Quei ei veramein necessari da sustener e promover igl emprender d'enconuscher la cardientscha per saver viver tenor quella ella veta da mintgadi. Impurtont eis ei era ch'ils geniturs sustegnan lur affons ell'instrucziun dalla scola.

Nus recumandain a Vus, preziai geniturs, educaturs, parochians e tuts votants da sustener la proposta dalla regenza che propona in'ura religiun ed in'ura etica en nossas scolas.

Religiun vul gie dir: Esser ligiai cun il Diu che la Bibla enconuscha e dalla quala ella dat verdeivla perdetga. Nus engraziein per Vies sustegn e sperein che Vus voteies in **GIE al model 1 + 1**.

### **Preavis:**

Mintg'onn organisescha la pleiv in pelegrinadi en in liug dil contuorn. Nus lein far attents vus ed animar da reservar **sonda, ils 16 da matg 2009**. Il pelegrinadi ei suenter miezdi allas 13.00h tochen ca. 18.00h. Il viadi meina nus ad Andeer cun ina viseta ella baselgia da Ziraun. El feagl parochial dil matg vegnan las ulteriuras indicaziuns. Beinvegni gia ordavon.

## Informaziuns per Laax

Communiun dils malsauns: Mesjamna, ils 15-04-09  
**suentermiezdi**

### Dumengia da Palmas:

La liturgia da quella dumengia entscheiva cun la benedicziun dallas Palmas. Nus serimnein sil plaz avon casa Pervenda. Sco Cristus ei entaus el marcau da Gerusalem aschia meina nosa processiuin en baselgia per celebrar ils misteris da quei venerabel di. Cun dumengia da Palmas entscheiva la gronda jamna digl onn nua ch'il cristifideivel celebrescha sia cardientscha en Cristus ch'ei vegnius el mund, che ha viviu e ha dau vi sia veta per spindrar nus.

### Beinvegni alla tschavera da suppa

Nus envidein ils parochians ed ils hosps alla tschavera da suppa ell'aula Grava. Tgi che giavischa da carrar cun auto sa spitgar suenter messa sil plaz Cadruvi. Il recav che vegn rimnaus per la suppa, per caffè e petta va en favur dils projects dall'unfrenda da Cureisma e Paun per tuts.

Nus engrazien al Cussegl pastoral per las preparaziuns ed il survetsch il di da suppa.

### Invitaziun alla radunonza dalla pleiv, ils 17 d'avrel allas 20.00h ella Sentupada.

Nus envidein tuts parochians e sperein sin stedia participaziun. La gliesta da tractandas vegn publicada el feagl ufficial.

**Vendita dad ovs da Pastgas, mesjamna ils 8 d'avrel.** Las catechetas ed ils affons colureschan ovs e vendan quels avon las stizuns dil vitg. Il recav va all'instituziun « terre des hommes » per agid als affons che ston viver sin via. Tgi da nos parochians che vul segidar sa dar giu ils ovs alla pasterneria Buchli tochen ils 8 d'avrel. Engraziel per vossa contribuziun ed il sustegn.

## Informaziuns per Falera

Communiun dils malsauns: Venderdis, 03-04-09 **suentermiezdi**  
Gievgia, 16-04-09 **suentermiezdi**

### Gratulaziun:

**Ils 16 d'avrel festivescha Nicolaus Heini siu anniversari dad 85 onns.** Nus gratulein da cor a nies parochian, giavischein buna sanadad, benedicziun da Diu ed in ventireivel di da fiasta.

### Fiasta dil s. Batten

Dumengia, da Pastgas retscheiva **Jon Welty**, feagl da Prisca ed Urs Welty-Cathomen il sogn sacrament dil Batten. Nus gratulein alla famiglia e giavischein an nies commember benedicziun e sustegn dalla cuminonza cristiana.

Sonda, ils 18 d'avrel vegn igl affon **Polina Linda Paula Fankhauser** prida si ella cuminonza dalla baselgia. La famiglia Frankhauser-Cassani ei en buna relaziun cun Falera entras la habitaziun da vacanzas e ha plascher sche lur affon vegn battegius a Falera. Nus selegrein cun la famiglia e gratulein alla nova commembra.



**Accziun da rosas.** La vendita da rosas instradaus dall'acziun Unfrenda da Cureisma ha purtau la gronda summa da 1'060.- frs.

Dieus paghi per vossa contribuziun ed engraziel a quels scolars e gidonters che han vendiu las rosas.

Il recav dil di da suppa cun la cumpra da mèl d'aviuls ha dau la summa da 1'900.-frs. Dieus paghi.

**Ina graziusa jamna sontga ed in ventireivel HALLELUJA a CRISTUS il leventau da mort en veta.**

